

“MALA SIRENA” – IGRAONICA ZA PREDŠKOLSKU DJECU

Korisnici projekta

U igraonici „Mala sirena“ Simin Han smo zadnjih 6 mjeseci radili sa 22 djece uzrasta 3-6 godina. Iako je u posljednjih 10-tak godina zabilježen drastičan pad nataliteta na području Bosne i Hercegovine, pa tako i Tuzlanskog kantona, mi smo kao i uvijek poslije ljetnog odmora upisali novu djecu, i radilo se punim kapacitetom.

O djeci iz igraonice

U igraonici se uvažavajući posebnosti svakog djeteta trudimo da stimuliramo sve razvojne oblasti: fizički razvoj, socio-emocionalni razvoj i razvoj ličnosti, kognitivni razvoj i razvoj govora, komunikaciju i stvaralaštvo.

Specifični ciljevi:

Zbrinjavanje djece predškolskog uzrasta i kvalitetna priprema za školu
Socijalizacija u grupno članstvo i kulturni identitet-osjećaj pripadnosti
Poboljšanje komunikacije
Razvijanje pozitivnijeg stava i osjećaja sopstvene vrijednosti prilikom savladavanja određenih vještina
Sticanje novih znanja i vještina
Sticanje higijensko-kulturnih navika i njihovo usvajanje
Nadzor zdravstvenog stanja djece
Razvijanje osjećaja rodne jednakopravnosti.

Aktivnosti u igraonici su organizovane i podijeljene po centrima:

Likovno-kreativni centar: aktivnosti u ovom centru svode se na crtanje, bojenje drvenim, masnim, vodenim bojama i temperama), izradu različitih predmeta (od papira, kartona, stiropora i sl), korištenje plastelina, makaza, konca, te niz drugih aktivnosti koje potiču dječiju kreativnost.

Centar za tjelesni odgoj i sport: upražnjavaju se takve aktivnosti koje zadovoljavaju dječiju prirodnu potrebu za kretanjem i igrom. Obično su to razne dječije igre, vježbe za pravilan rast i razvoj, vježbe za razvoj pokretljivosti, ravnoteže i koordinacije pokreta.

Muzički centar: aktivnosti se uglavnom svode na učenje novih pjesama, osjećaj za ritam i ples, pojedinačno i zajedničko pjevanje i recitaciju.

Dramski centar: uglavnom podrazumijeva imitaciju pojedinih likova ili životinja, recitaciju pjesama uz glumu ili ples, predstave pod maskama i sl.

Centar za igru: upražnjavanje slobodnog vremena uz igru sa različitim igračkama (lego kocke, autići, lutke, igre memorije, loptice, i sl.), gledanje crtića, itd.